

Incumbensa Müller (Favugn) concernent l'introducziun da prestaziuns supplementaras per famiglias en il chantun Grischun

En la sessiun d'avust 2020 aveva il Cussegl grond concludì d'abolir la Lescha davart contribuziuns da maternità. Cunter quai è vegnì fatg in referendum. Ils 13 da zercladur 2021 ha il pievel grischun refusà l'aboliziun da questa lescha. En tut ils champs politics eri dentant incontestà ch'igl exista da princip in basegn da refurma areguard las contribuziuns da maternità. Il crap da stgarpitsch dal project refusà era cunzunt il fatg che la povradad da famiglias fiss vegnida spustada en l'agid social.

La gruppa da vegliadetgna da las persunas da 0 fin 17 onns munta a var in terz da tut las persunas che retiran agid social. Quai vul dir: la povradad da famiglias è – cun u senza contribuziuns da maternità – in problem ch'ins sto prender serius. Il sguard sin auters chantuns mussa che las prestaziuns supplementaras èn il sistem il pli simpel ed il pli efficazi per impedir la povradad da famiglias. Chantuns sco p.ex. Vad, Soloturn u Tessin han fatg dapi onns fitg bunas experientschas cun talas. En il chantun Tessin survegnan p.ex. geniturs prestaziuns supplementaras, sch'els realiseschan entradas che na segireschan betg lur existenza. Ils custs per questas prestaziuns supplementaras èn en il chantun Tessin cleramain pli bass ch'ils custs per l'agid social.

Prestaziuns supplementaras chantunales per famiglias èn nunbirocraticas, efficazias sco er ina distgargia potenziala per las vischnancas che ston surpigliar ils custs da l'agid social. Già l'onn 2011 era la fracziun da la PCD grischuna s'engaschada per ina tala soluziun. La Regenza aveva dentant refusà il project, en spezial er cun renviar a la regulaziun existenta davart las contribuziuns da maternità.

Sut l'aspect da las debattas manadas, da las experientschas d'auters chantuns e dal basegn da refurma incontestà areguard il tema da las contribuziuns da maternità incumbenseschan las sutsegnadras ed ils sutsegnaders la Regenza da dar en consultaziun in nov project che prevesa prestaziuns supplementaras per famiglias. En spezial pretendan las sutsegnadras ed ils sutsegnaders ch'il nov project na tractia betg differents champs tematics.

Tavau, ils 16 da zercladur 2021

Müller (Favugn), Favre Accola, Widmer (Favugn), Atanes, Baselgia-Brunner, Bondolfi, Cantieni, Caviezel (Cuira), Degiacomi, Della Cà, Dürler, Felix, Gartmann-Albin, Gort, Hofmann, Horrer, Perl, Preisig, Rutishauser, Schwärzel, von Ballmoos, Wilhelm, Spadarotto, Stieger, Tomaschett (Cuira)